

Date – 11/08/2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Aizawl leh Silchar inkar kawngpui chhiat lutuk avanga lirthei tangkhang te chhuah chhoh mek a ni a, Aizawlah mipui nitin mamawh te phurh thlen mek a ni.
2. Chawngte leh Rualalung khaw inkar kawng chhia avangin vawiin atang hian maxi cab service te an chawlh tan.
3. Nimin khan Union Sports and Youth Ministry huaihawtin Fit India Sundays Cycle tlan runpui neih a ni.
4. Prime Minister Narendra Modia chuan vawiinah MP te chenna tur Type-VII Multi-Storey flat 184 chu Baba Kharak Singh Marg, New Delhi-ah a hawng dawn.

<><><>

VEHICLE MOVEMENT

Aizawl leh Silchar inkar kawngpui, Mizoram chaklakna kawngpui ber a chhiat lutuk avanga lirthei tangkhang te chhuah chhoh mek a ni a, Aizawlah mipui nitin mamawh te phurh luh mek a ni a,

Sorkar hotute hnen atanga thu dawn danin nimin tuk dar 8 thleng khan Kawnpui atangin Aizawl lam pan lirthei 603 chhuah a ni a. An chhuah zingah hian eirawngbawlina gas phur 25 leh tuialhthei phur 62 a tel a. Tuialhthei phur zingah hian petrol phur 29, diesel phur 27, phurh pawlh 5 leh thlawhtheihna hman tur tuialhthei phur 1 a tel a ni. Kolasib/Assam lam pan Sairang peng leh Khamrang/Mualkhang atangin lirthei 223 chhuah a ni bawk a. an chhuah zawng zawng hi lirthei 826 a ni. Lirthei tangkhang hi a tlem tawh hle a. Aizawl lam pan tur 31 leh Assam lam pan tur 5, a vaiin 36 chhuah loh a la awm a ni.

He tih lai hian Sairang/Buichali leh Kawnpui inkar kawng chhe zualpui chu siamthat thawkhat tawh niin sorkar lam chuan a sawi na-in sumdawng lirthei neitu leh khalhtu pawlte chuan hun rei a daih loh an hlauhthawn thu an sawi a. Kawngpui siamna atana an lung hman thenkhat chu a chang tawk lo ni a sawi an awm bawk.

<><><>

I-DAY INVITATION

Kumin Independence lawmna neih tura President at home a tel tura a sawm bik mi 150 zingah Pachhunga University College zirlai, Grace Lalrinpari Hauzel chu a tel a, sawmna ropui tak a dawng chu vanneihthlak a tih thu Akashvani a hrilh.

Grace Lalrinpari Hauzel hian President sawmna hi Zirtawpni khan India Post Office Aizawl-te chuan a chenna in Khatlaah an hlan a ni. Kumin January thla khan Viksit Bharata Young Leaders Dialogue 2025, New Delhi-a neihah Youth representative of India thlan zingah Grace Lalrinpari hi a tel a, Mizoram district 11 atanga State level National Youth Parliament 2024 intihsiaakah lawmman pakhatna a la tawh bawk a. Heng bakah hian chawimawina hrang hrang a lo dawng tawh a ni.

<><><>

ROAD BLOCK

Chawngte MaxiCab Welfare leh Chawngte Maxicab Owner Assn chuan Chawngte leh Rualalung khaw inkar kawng chhia avangin vawiin atang hian tlan tawh loh an tum.

Chawngte atanga thudawn danin Chawngte atanga km 1 pawh tlinglo, Rualalung nen an inkarah hian kawng hi namen lovin a chhia a, motor te a tlu a, innawr a, in pawhchhuah reng a ngai thin a ni an ti.

Hetihlai hian Bualte leh Thualthu inkar kawng min chu thenfai hleihtheih a la ni lo a. Kawngmin hian Lirthei a la dang tam hle a, an chaw ei tur buhfai, Alu etc DM&R DC Office lamin tumin heng hi Bualte khawtlang chuan an Kohhran Hall-ah an chhum sak thin a ni. Nimin khan BCM Hqtrs chuan khualzin tangkhang te ei tur lei nan cheng sing 2 Bualte khawtlang hruaitu te kutah an hlan ve leh a ni.

Lunglei SP Pu J. Lalmuankima chuan Akashvani Aizawl zawhna chhangin leimin chu thenfai hna thawh mek a nih thu leh Thualthu lam zawkah thenfai tur a la tam thu a sawi a. Lirthei kaltlang theiha an thenfai theih hun tur a la hriat loh thu sawiin khaw awm dan azirin a hriat theih chauh tur thu a sawi a ni. Bualte khua atanga thudawn danin leimin hi thenfai a nih lai-in kawng chhak lam atangin a min leh a. Tuna leimin an paih fai mek chu thenfai pawh ni se, a chhak lam tawlh zui tur a la awm leh a ni.

Lawngtlai West bialtu MLA Pu C. Ngunlianchung a chuan Mizoram chhim lam Lawngtlai leh Siaha district kalpawhna kawngpui pawimawh tak a pin avanga khualzin tangkhangte Bualte leh Thualthu khawtlangin an lo buaipui avangin lawmthu a sawi a ni.

<><><>

HAND-HOLDING SCHEME

Adviser to Chief Minister Dr. Lorrain Lalpeklia Chinzah chuan Bana Kaih (Handholding Scheme) hnuaia Loan leh Chief Minister Special Package dawngtu thlan chhuah chungchangah MLA te an inrawlhlo tih a sawi.

Social Media kaltlanga he thu hi sawiin Dr. Lorrain Lalpeklia Chinzah chuan Bana Kaih (Handholding Scheme) hnuaia Loan leh Chief Minister Special Package hamthatna dawng tur chu Department in a diltute atangin thawhpui tlaka an ngaihte an thlang chhuak tih a sawi a. Mipui Sawrkar an nihna ang takin, party leh MLA te'n dik takin hmalak zel an tum thu a sawi a ni.

Lawngtlai Bawrhsap pisa bultumin DC Conference Hall-ah Bana Kaih Scheme hnuaia Chief Minister's Special Package atana thlan thawhpui turte (Progress Partners) tan Orientation Training chu Bawrhsap Pu Cheemala Siva Gopal Reddy kaihhruaiin hman lo ni tawh a. Bawrhsap chuan Progress Partners- te chu Sawrkarin mi taima leh rinawm, hlawhtlinna chang ngei tura thawk tura a beiseite a thlanchhuah an nihna hriaa, theihtawp chhuah turin a lo chah tawh a. Lawngtlai District -ah hian Department paruk nena thawkho turin Progress Partners mi - 81 thlanchhuah an ni.

<><><>

ANTI DRUG CAMPAIGN

Mizoram Presbyterian Kohhran thalai pawl, KTP in thla hmasa ni 1 atanga Ruihhlo Do beihpui, Street Ministry an kalpui mek chu tun thla tir khan an kal dan tidanglam hlekin an kalpui chhunzawm zel.

Central KTP hnuaia Ruihhlo Do Committee Secretary Pu David Lalruatfela chuan Akashvani Aizawl zawhna chhangin Central KTP Ruihhlo Do Street Ministry chu July thla tir atang khan Zirtawpni zan apiangin Aizawl khawpui chhungah chuan hmun thlanchhuah 14-ah te Branch KTP hrang hrang ten an kalpui thin thu leh, khawpui pawn Mizoram khaw hrang hrangah chuan an remchan angin hmun thlan bik awm loin an kalpui thin thu a sawi a. Ruihhlo ngai te hnenah ei leh inte semin a remchan angin couselling te pein hun an hmang thin a ni.

Pu David Lalruatfela chuan Branch KTP kalchhuak thinte thil tawn thlirin hmun thlanchhuah sa 14 zinga hmun 7 chu ruihhlo ngai hmuh tur an awm loh avangin Central KTP Committee chuan tun thla tira an thutkhawmah an paih tih a sawi a. Tunah hian hmun 17 thlan chhuah bikah te Zirtawpni zan apiangin branch KTP te an thawkchhuak thin tih sawiin September thla atang chuan kar khatah tum hnih, Thawhlejni leh Zirtawpni zana te ngawrh taka kalpui chhunzawm an tum tih a sawi a ni.

Ruihhlo Do - Street Ministry hi kumin December ni 19 thlenga kalpui tura ruahman a ni a, Aizawl khawpui mai bakah Mizoram chhunga branch KTP hrang hrangin an kalpui bawk a. Central KTP chuan KTP Branch tin te anmahni huam chhunga ruihhlo avanga harsatna tawk te ngaihven turin an ngen bawk a. Ruihhlo that loh zia thuziak tarlanna hoarding pawh tar beihpui an thlak mek a. Mizoram chhunga branch KTP ten an remchan dan angin an tar a. Khawpui chhung branch 81 tan AMC ah tar phalna dilin an hmu tawh bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ASSEMBLY

Tun thla ni 27 chawhma dar 10 leh a chanve atanga tan tur Mizoram state legislative assembly fur inkhawm ni 2-awh tura ngaihtuah tur sorkar atangin dan thar emaw dan dinglai siamthat tur emaw lut a la awm lo.

Assembly secretariat atanga thudawn danin Assembly hi thu dang a awm a nih loh chuan August ni 27 leh 28-a thukhawm turin assembly speaker Pu Lalbiakzama hova business advisory committee (BAC) thukhawm chuan an rel a. Dan thar emaw dan dinglai siamthat tur emaw lut la awm lo mah se, environment, forests & crimate change department atangin official resolution pakhat a lut tawh a. House chhunga chhan chi zawhna 77 leh ziaka chhan chi zawhna 27 a lut tawh bawk. Assembly fur inkhawm hi Zirtawpni an thut thlen dawn loh avangin private member resolution a lut lova, private member bill pawh a la lut lo. Inkhawm ni hmasa zawkah hian July ni 21 a Delhi a a inenkawl lai a chatuan ram pan ta MNF MLA Pu Lalrintluanga Sailo sunna hun hman a ni ang. Tun tum fur thutkhawm hi Assembly 9-na inkhawm vawi 5-na a ni dawn a ni.

Hun a chep chungin eptu MLA-te chuan National Highway 306 leh 6 kawng chhe lutuk avanga mipui-in harsatna namen lo an tawh chungchangte sawi chhuah an tum thu an sawi a ni.

<><><>

BIOMETRIC ENROLMENT

Raltlante kutzia leh mit-naute lakkhawm hna Mizoram district 11-a kalpui mekah Zirtawpni tlai thleng khan Myanmar raltlan 1,947 biometric enrolment tih tawh a ni.

Home department hotute sawi dan chuan Myanmar raltlan 32,000 chuang leh Bangladesh raltlan 3,000 tling lo deuhthe mit-naute leh kutze lakkhawm hna hi July ni 28 a bul tan an awm laiin a nawlpui chuan July ni 30 leh 31-ah an tan a, July thla tawp lamah bul an tan hman vek a ni. Chutih lai-in district hrang hranga he hna thawktute hian harsatna an tawk a. A bik takin biometric enrolment hnathawhna electronic khawl hman hleih theih loh a awm nual a, chu bakah internet signal dawn that tawk lohna hmunah harsatna an tawk bawk a. Relief camp-a a huhova awmte mit-naute leh kutze thla lak a awlsam viau lai-in an fate Aizawl leh district danga lehkhazir mekte an awm avangin lak kim vek hleih theih loh a awm a. An chhungte leh thiante belte leh mi inluahte chu an awmna hmun a inkar-kik avangin hna a kal chak thei lo bawk a ni.

Myanmar raltlan awm tam berna Champhai district-ah hian mi 13,500 chuang an awma ngaih a ni a. Chuti chung chuan Champhai district official-te electronic khawl hman hi a fuh theih loh avangin Inrinni khan Aizawl atangin khawl thar an la leh a. Tun kar chho hi chuan an thawk tuang thei tura an inngaih thu an sawi a. July ni 31 atang khan an hna tan tawh mah se, mi 7 chauh biometric enrolment an la ti thei a ni.

Myanmar raltlante hi district 11-a an awm lai-in Bangladesh Chittagong Hill Tract atanga raltlante hi district pathumah chauh an awm a. Lawngtlai district-ah mi 2,000 chuang an awm a, Thenzawl khawpui-ah 266 awmin Lunglei district a Khawmawi khua-ah 63 an awm bawk a ni.

Tun dinhmunah hian Mizoramah Myanmar raltlan hi mi 32,504 an awm mek ni a chhinchhiah a ni a. Champhai district-ah tam berin, Lawngtlai district leh Siaha district te'n an dawl a ni.

<><><>

FIT INDIA CYCLE

Nimin khan Union Sports and Youth Ministry huaihawtin Fit India Sundays Cycle tlan runpui neih a ni. Union Sports Minister Mansukh Mandavya chuan ramchhung hum sing 4 chuang atangin mi nuai 7 chuang he beihpui thlakah hian an tel a ti a. New Delhi-a Fit India Sundays on Cycle Tiranga Rally ah Union Minister Mandaviya hi tel vein Panchayat hrang hrang atanga aiawh an tel bawk a. Pu Mandaviya chuan ramchhung thingtlang hmun hrang hrangah Fit India thuchah chu Panchayat aiawh ten hmun sing 5 chuangah an thehdarh a ni a ti.

<><><>

PM

Prime Minister Narendra Modia chuan vawiinah MP te chenna tur Type-VII Multi-Storey flat 184 chu Baba Kharak Singh Marg, New Delhi-ah a hawng dawn. He hunah vek hian PM Modia hian Sindoor thingtiak phunin Shramjeevis te en an inkawmho dawn bawk a ni.

PMO thuchhuah danin vawiina PM Modia hawn tur inchhawngte hi chhawng khat hi square feet sang nga theuha zau a ni a. MP te tana chenna in mai bakah official hna thawhna tur hmun zau tak ruahman a ni.

<><><>

RIAL HUB

Defence Minister Rajnath Minister chuan nimin khan rel pindan siamna tur BEML Rail Hub cheng vaibelchhe 1800 hi Madhya Pradesh ah a hawng. He rel siamna hmunpui hi Umariakhuuaa ram hectare 60 a zauah din a ni a. Mi 5000 chuang tan eizawnna a siam theih beisei a ni. He hmunah hian Vande Bharat, Amrit Bharat leh Metro train te siam a ni ang.

<><><>